



INFORMATIVNI BILTEN OPĆINE ILIDŽA

Ilidža • Januar 2020

• Broj 188





Priznanja najzaslužnijim 12. marta na Dan Općine



Općinsko vijeće Ilidža na 34. sjednici 30. januara 2020. godine u Multifunkcionalnoj sali donijelo je Odluku da počasni građanin Ilidže bude Sulejman Sandžak, a da se Plaketa za životno djelo dodijeli prof. dr. Hamdi Lokvančiću i Adisi Tufo. Zlatna plaketa pojedinačna ići će u ruke Mirsada Mirojevića, a Kolektivna Zlatna plaketa Udruženju boraca "Prva samostalna brigada Sarajevo". Srebrnu plaketu pojedinačnu dobit će Eldin Jelašković i posthumno Fikret Moro. Plaketu odbrane dobio je Nezim Halilović Muderis. Zahvalnice će dobiti: Hasan Šišić, Faris Šaćić, Adem Bašić, Dženan Hošić i Fuad efendija Golić. Nagrade i priznanja će biti dodijeljene na svečanoj sjednici Općinskog vijeća Ilidža 12. marta kada se obilježava Dan Općine Ilidža.

Adisa Tufo svoju poduzetničku karijeru započela je 1990. godine na Ilidži, ali ozbiljno zakoračila u svijet biznisa, kroz privatni sektor, tek nakon agresije 1996. godine, kada sa suprugom pokreće kompaniju koja se bavi elektroinstalaterskim radovima. Kao uspješna poduzetnica, aktivistica, domaći i regionalni predavač dobitnica je nekoliko nagrada za svoj rad i doprinos kako u Bosni i Hercegovini, tako i u regionu.

Prof. dr. Hamdo Lokvančić Gimnaziju i Veterinarski fakultet završio u Sarajevu još 1955 godine. Bio prvi diplomirani student fakulteta. Korisnik je četverogodišnje Humboltove Fondacije na Univerzitetu u Hanoveru - Njemačka. Dao je veliki doprinos razvoju veterinarske struke u zemlji. Njegov ratni doživljaj poslužio je kao prilog akademiku Abdulahu Sidranu da napiše scenarij za film "(A.Tozija)" koji je na filmskom festivalu u Berlinu nagrađen sa Zlatnim medvjedom i bio nominiran za Oskara. Za vrijeme agresije bio član Ratnog predsjedništva i član civilne zaštite.

Nezim Halilović Muderis dobio je nagradu za izuzetan rad i doprinos u mnogim područjima života i rada, a naročito promociju Bošnjaštva. U početku otpora na agresiju osniva dobrovoljnu jedinicu "Muderris", čiji je i komandir. Formiranjem 4. Muslimanske slavne brigade postavljen je za njenog komandanta i na toj dužnosti ostaje sve do kraja agresije. Životni vijek posvetio je afirmiranju pozitivnih ljudskih vrijednosti i doprinosu jačanja svijesti kod Bošnjaka.

Mirsad Mirojević iz JNA u Armiju BiH se priključio 11. aprila 1992. godine. Obavljao je dužnost zamjenika komandanta TO Sokolović- Kolonija, a od 15. maja do decembra 1992. godine dužnost komandanta Odreda „22. april“. Nakon

toga raspoređen je u komandu Četvrte viteške gdje obavlja dužnost pomoćnika načelnika za odbranu i pomoćnika komandanta za Obavještajne poslove. Ostaje u Armiji do kraja i 2004. u činu u majora odlazi u penziju. Ranjen na zadatku 1994. godine na Igmanu. Zbog posljedica ranjavanja proglašen 70 posto RVI. Trenutno obavlja dužnost direktora OKI FANTOMA. Za svoj rad više puta je proglašen najboljim sportskim radnikom u paraolimpijskim sportovima u KS i BiH. U Washingtonu 2011. uručena mu je svjetska nagrada, za pomoć žrtvama mina za tu godinu.

Prva samostalna brigada Sarajevo formirana je 19. maja 1992. godine u okviru Regionalnog Štaba Teritorijalne odbrane Sarajevo. Uz 4. Vitesku brigadu, Prva samostalna brigada - Sarajevo je jedina izvorna ilidžanska brigada Armije Republike BiH koja je formirana i djelovala na području ilidžanskih mjesnih zajednica Otes, Stup 1, Stup 11 i Stupsko brdo u okviru kojih je imala zonu odgovornosti.

Sulejman Sandžak porijeklom iz Sandžaka. Živi u Turskoj, čovjek koji je dao veliki doprinos u toku agresije na BiH u zbrinjavanju izbjeglih i raseljenih osoba u Turskoj iz BiH. Učesnik je mnogobrojnih humanitarnih aktivnosti za BiH u ratu. Veliki humanista čiji angažman nije prestao ni danas jer pomaže u liječenju građana Ilidže, a njegova humanost se ogleda i u organizovanju iftara, novčanih pomoći i izgradnji džamije u Gornjem Kotorcu.

Fikret Moro dobio je priznanja Mjesne zajednice Sokolović- Kolonija za izuzetan doprinos u organizovanju, razvijanju i izvršavanju postavljenih zadataka od posebnog društvenog značaja kao i jačanju borbene spremnosti, moralnog jedinstva i odbrambene sposobnosti naroda naših prostora. Taj čovjek nema straha, govorili su njegovi suborci i što je opasnost veća on je hrabriji i odlučniji. Vječiti dobrovoljac i čovjek pozitivne energije i optimizma Bio je pripadnik Armije BiH od početka agresije do 09. 02. 1996. godine. RVI 100%. Nakon kraće bolesti preselio na ahiret u oktobru 2017. godine

Eldin Jelašković već dugi niz godina radi u bosansko-hercegovačkom fudbalu kao kondicioni trener i osvajao je trofeje. Pored rada s domaćim klubovima, Jelašković radi i sa mnogim vrhunskim sportistima, a aktuelni je prodekan za nastavu Fakulteta za sport, autor je sedam knjiga, brojnih naučnih i stručnih radova.



Vijeće traži od Vlade da karta Vijećnica-Hrasnica košta 2 KM

Na osnovu dopisa "Centrotransa-Eurolinesa" Općinsko vijeće Ilidža donijelo je jednoglasno zaključak da se zahtjeva od Vlade Kantona Sarajevo i Ministarstva saobraćaja Kantona Sarajevo da promijeni način održavanja komercijalne linije Drvenija-Hrasnica i to tako da se ta linija održava kao kružna linija i prometuje na relaciji Hrasnica-Ilidža-Marijin dvor-Drvenija-Vijećnica, kao i da se promijeni cijena autobuske karte i da iznosi 2.00 KM, poput komercijalne linije Dobrinja-Vijećnica, a sve u cilju da se građanima Općine Ilidža pruži kvalitetna usluga gradskog prevoza.

Imenovana Skupština JP "Ilidža"

Općinsko vijeće donijelo je Odluku o imenovanju predsjednika i dva člana Skupštine Javnog preduzeća za obavljanje komunalnih i drugih djelatnosti od javnog interesa Općine Ilidža "Ilidža" d.d.

U ovu Skupštinu imenovani su: Alvid Hubijar, predsjednik, a članovi Hidajet Bešić i Mirsad Žujo.

Razriješen Amar Kečo

Općinsko vijeće Ilidža na 34. sjednici, po zahtjevu Demokratske fronte, donijelo je rješenje o razrješenju člana Komisije za imovinsko-pravna pitanja i stambene poslove Amara Kečo, te donijelo rješenje o imenovanju Snježane Soldat na to mjesto.





Predsjedavajući Skupštine Kantona Sarajevo Mirza Čelik posjetio Općinu Ilidža

Izabranik nove skupštinske većine za predsjedavajućeg Skupštine Kantona Mirza Čelik posjetio je 8. januara 2020. Općinu Ilidža. Sa načelnikom Općine prof.dr. Senaidom Memićem razgovarao je o budućoj saradnji Skupštine i ove lokalne zajednice. Bilo je riječi o projektima koje Općina Ilidža planira realizovati u 2020. godini i za koje je neophodna pomoć Kantona Sarajevo.

„Svaka lokalna zajednica nam je bitna i radit ćemo s njima kako bi došli do najboljih rješenja za zakone o lokalnoj samoupravi i pripadnosti javnih prihoda”, rekao je Čelik.

„Podržavamo novu skupštinsku većinu i pozivamo one koje su u prethodnom mandatu bili da čuvaju svoj obraz i interes, da ne govore riječi zbog kojih će stiditi jer godine mandata brzo prođu. Poručujem da ne treba stvarati nered među ljudima i ne treba prijetnjama oponašati vlast. Nova vlast i vlada moraju uvijek biti bolji od onih koji su otišli. Općina Ilidža poštuje svoje predstavnike i red i zakone, kad



smo većina i kad nismo, izjavio je načelnik Memić i dodao da vjeruje u budućnost Kantona Sarajevo.

„Zahvaljujem se načelniku Memiću na podršci. Sredstva koje Kanton planira preusmjeriti će se u realizaciju kapitalnih projekata od izgradnje tramvaj pruge, žičare, osnovne škole na Stupu, saobraćajne infrastrukture, do izgradnje javne garaže, kao i svih drugih projekata koji su u interesu lokalne zajednice. Stojim vam na raspolaganju kao pomoć u realizaciji svih vaših projekata”, naglasio je Čelik.

Podrška reintegraciji povratnika u BiH

Općina Ilidža spremna je sa CRS - Catholic Relief Service-om realizirati projekat “Podrška reintegraciji povratnika u BiH”, dogovoreno je na sastanku u Općini 20. januara 2020.godine.

Donator ovog projekta je Vlada SAD-a, a implementator je CRS. Tim projektom su planirana sredstva za podršku u ostvarivanju socio-ekonomske održivosti povratnika 80 posto od donatora, a ostalih 20 posto učestvuje lokalna zajednica.

Načelnik Općine Ilidža prof.dr. Senaid Memić iskazao je spremnost za realizaciju ovog projekta kojim će se osnažiti povratnici (zapošljavanje u maloj privredi, zapošljavanje u poljoprivredi, uvođenje u prava iz domena socijalne zaštite u cilju ostvarivanja prihoda iz programa pomoći održivog povratka, za reintegraciju povratnika i integraciju osoba koja nisu u mogućnosti da se vrate u prijeratne zajednice, te se integrišu u novim zajednicama). Općina Ilidža jedna je od 60 općina u BiH koje realizuju ovaj projekat.



Ministar Ismir Jusko u posjeti Općini Ilidža

Ministar za boračka pitanja Kantona Sarajevo Ismir Jusko posjetio je 20. januara 2020. godine Općinu Ilidža. Sa načelnikom prof.dr. Senaidom Memićem razgovarao je o aktuelnoj problematici u ostvarivanju prava boračke populacije na kantonalnom nivou.

Iskazana je spremnost za nastavak dobre saradnje Ministarstva za boračka pitanja i Općine, a posebno aktuelnih projekata upošljavanja i samozapošljavanja boračke populacije, koji su prihvaćeni kao projekti trajnog rješavanja problema ove kategorije društva.



Načelnik Memić uručio telefonske dopune migrantima

Načelnik Općine Ilidže prof.dr. Senaid Memić 31. januara podijelio je telefonske dopune u iznosu po 15 KM za ukupno 650 migranata koji borave u migrantskom centru u Blažuju. Na ideju da se migrantima doniraju dopune za mobitele došlo se nakon promišljanja šta je migrantima u ovom trenutku najpotrebnije s obzirom na to da su odvojeni od porodica.

“Krenuli su na put za koji ne znaju dokle će stići. Sračunali smo šta bi bilo najhumanije, jer svi imaju porodice, a najveći trošak su im telefonski računi. Mi smo zato odlučili da im u okviru skromnih mogućnosti, više simbolično, nego što ćemo napraviti veliki pomak, dodijelimo po 15 KM za njih 650. Ne mislimo da smo skinuli brigu, mislim da smo uradili nešto sitno što je trebalo uraditi” izjavio je načelnik Memić.

Prema njegovim riječima stotine migranata već dva mjeseca boravi na ovoj lokaciji.

“Očekivali smo da se svašta može dešavati s obzirom na njihov broj, ponašanje, status ili namjere. Ali veoma smo iznenađeni da ima samo mali broj problema koje prave pojedinci. Ništa nije krenulo u lošem smjeru”, rekao je načelnik Memić, te dodao da ima dobru saradnju sa IOM. Jedan od migranata iz Afganistana kazao je kako je donacija Općine Ilidža u vidu telefonskih dopuna sjajan potez.

“Ovo je odlično jer mnogi nemaju novac da kupe dopunu, a svi želimo komunicirati s porodicama. Ipak, ovdje imamo i Wi-Fi. Mnogo je bolje nego ranije. Imamo tri obroka dnevno, nove toalete i kupaonice, odjeću i obuću, nove krevete i posteljine. Imamo sve što je potrebno. San mi je da predem u neku od zemalja EU na proljeće”.

Općina sufinansirala kupovinu specijalnog vozila VW caddy

Općina Ilidža sufinansirat će kupovinu specijalnog vozila VW caddy za potrebe Udruženja ratnih vojnih invalida paraplegičara u Kantonu Sarajevo, dogovorili su na sastanku 22. januara 2020. načelnik prof.dr. Senaid Memić i predsjednik ovog udruženja Elvis Sudar. Udruženje RVI paraplegičara Kantona Sarajevo broji 60 članova.

“Kupovina ovog vozila mnogo će pomoći u našim svakodnevnim aktivnostima. Mi smo ratni vojni invalidi najtežeg oblika i vozilo će nam biti od koristi za nesmetan prijevoz našim članovima u svrhu odlaska na bolničke preglede, prijevoz članova stan-klub RVI paraplegičara KS -stan i ujedno bržu i bolju resocijalizaciju i njihovu integraciju u društvenu sredinu. Hvala načelniku na razumijevanju”, rekao je Elvis Sudar, predsjednik Udruženja ratnih vojnih invalida paraplegičara KS.

Načelnik prof. dr. Senaid Memić naglasio je da prilikom raspodjele budžetskih sredstava posebno se mora voditi računa o ovoj kategoriji.

“O svima njima moramo voditi računa. Naravno, znamo i da koliko god da im damo da to nije dovoljno u odnosu na njihove žrtve”, naglasio je načelnik Memić.




Za zimsko održavanje pet firmi

Za zimsko održavanje cesta na području općine Ilidža zaduženo je pet firmi. Konzorcij Braća Mujić d.o.o. i Beton fresh d.o.o održavaju ceste u MZ Rakovica, MZ Blažuj, MZ Osjek.

Konzorcij Nane kompani d.o.o. i Ceste company d.o.o. zadužene su u MZ Vrelo Bosne, MZ Vreoca, Lužani, Sokolović-Kolonija, Hrasnica i MZ Hrasnica II.

Konzorcij Mevludin commerc d.o.o. i Milišić trans d.o.o. održavaju u MZ Ilidža Centar, Otes, Stup, Stup II, MZ Stupsko brdo, MZ Butmir i MZ Donji Kotorac.

Tel kabl d.o.o. čisti ulice u naseljima Zoranovići, Šerifići, Jasen. JP Ilidža d.o.o čistit će pješačke staze.





Općina Ilidža pružila besplatnu pravnu pomoć za 646 osoba

U 2019. godini besplatnu pravnu pomoć u Općini Ilidža zatražilo je ukupno 646 osoba, od toga 492 za sastavljanje pismenih podnesaka, a 154 za usmeni savjet. Pružajući ovu vrstu pomoći, službenici zaduženi za taj segment sačinjavali su za građane žalbe, prigovore i zahtjeve po raznim osnovama te dali veliki broj usmenih pravnih savjeta. Pružanje pravne pomoći u oblasti radnih odnosa odnosilo se na sastavljanje zahtjeva i prigovora poslodavcu, žalbi nadležnim organima i tužbi nadležnom sudu, vezano za ostvarivanje prava-potraživanja iz radno pravnog odnosa.

U oblasti boračko-invalidske zaštite pravna pomoć pružena je u vidu sastavljanja tužbi Vrhovnom sudu FBiH nakon provedenog postupka revizije, odnosno zakonitog korištenja prava korisnika po Zakonu o pravima branilaca i članova njihovih porodica i žalbe za priznavanje prava na porodičnu invalidninu. Licima u stanju socijalne potrebe u 2019. godini pružena je pravna pomoć u vidu sastavljanja podnesaka zbog priznavanja prava na stalnu novčanu pomoć, ličnu invalidninu, dodatka za njegu i pomoć od drugog lica i ortopedski dodatak, dječiji dodatak

Pravna pomoć se pružala građanima i iz oblasti penzijsko-invalidskog osiguranja u vidu sastavljanja žalbi i tužbi protiv rješenja Federalnog zavoda za PIO/MIO - kantonalne administrativne službe u vezi ostvarivanja prava na invalidsku i porodičnu penziju i prava na naknadu troškova sahrane u skladu sa Zakonom o PIO-u.

Što se tiče pružanja pravne pomoći u oblasti građanskih stanja, prema vanparničnom odjeljenju Općinskog suda sastavljali su se prijedlozi za pokretanje ostavinske rasprave, prijedlozi za donošenje dopunskih rješenja o nasljeđivanju, prijedlozi za oduzimanje poslovne sposobnosti, prijedlozi za dokazivanje smrti, prijedlozi za dozvolu za sklapanje braka, prijedlozi za oduzimanje roditeljskog staranja i drugo.

Pravna pomoć je u jednostavnijim slučajevima pružana odmah, a ukoliko se radilo o složenijim predmetima zahtjevi korisnika su rješavani i u roku od 24 sata. Veliki broj pravnih savjeta dat je i putem telefona. U izvještajnom periodu kod pružanja besplatne pravne pomoći ostvarivana je stalna saradnja sa službama za upravu i drugim službama.



U 2019. godini na Ilidži registrovano 249.829 dolazaka i ostvareno 487.142 noćenja

U 2019. godini registrovano je 249.829 dolazaka i ostvareno 487.142 noćenja, a turistima je bilo na raspolaganju 31 smještajni objekat sa više od 2.200 smještajnih jedinica i 5.200 ležaja na području općine Ilidža. Prema podacima Zavoda za informatiku i statistiku Kantona Sarajevo, Općina Ilidža već 12 godina kontinuirano zauzima vodeću poziciju po broju dolazaka i ostvarenih noćenja turista, te broju raspoloživih smještajnih jedinica i ležaja. U registrima za obavljanje djelatnosti fizičkih lica pri Općini Ilidža upisano je ukupno 1.315 privrednih subjekata (630 obrtničkih i 313 trgovačkih radnji/djelatnosti, 198 ugostiteljska objekata, 78 taksi prevoznika, 52 autoprevoznika, 34 fijakerista i 10 autoškola). Privrednih subjekata je 3.421. koji se registruju u registarskom sudu (pravna lica), a koji imaju sjedište ili poslovnu jedinicu na području općine Ilidža.

Investicijama privatnog sektora povećan je ukupan broj smještajnih kapaciteta. Uz ranije otvorene hotelske kapacitete: Terme, Hercegovina, Crystal, Hollywood, Radon Plaza, Rimski most, Delminium, Previla-bivši Imžit, Bosna 1, BM, BM Internacional, Heco plus, Gastro ID, Elegance, Ahar, Suljović, Merona, Aleja i motel Mujanić, dodatno je ojačana pozicija i značaj Općine Ilidže kao turističke destinacije, te je proširena ponuda kroz visoko kategorisane kapacitete i to: Turističko naselje "Čenga" (hotel, tri vile i restoran), hotel "Austria i Bosna", hotel Koncept Residence, hotel "Orange" i izgradnjom sportske dvorane u kompleksu "Hills".

Općina Ilidža kontinuirano sprovodi aktivnosti na poboljšanju cjelokupnog ambijenta življenja za građane i posjetitelje. Tako je 2018. godine završena rekonstrukcija Male aleje, postavljanje tendi-nadstrešnica koje se koriste kao prostor za ljetne bašte, a u septembru 2019. godine rekonstrukcija, restauracija i sanacija "Vrtlarske kuće", objekta u vlasništvu Općine Ilidža, te je otvoren pješački most u naselju Pejton, koji osim funkcionalne, poboljšava i estetsku sliku Ilidže.

Dobra saradnja Općine i Međunarodnog aerodroma

Predstavnicima Međunarodnog aerodroma Sarajevo predvođeni direktorom Arminom Kajmakovićem posjetili su 23. januara 2020. Općinu Ilidža. Sa načelnikom Općine prof. dr. Senaidom Memićem i njegovim saradnicima, razgovarano je o dosadašnjoj saradnji, ocijenivši je izuzetno uspješnom, kao i budućim aktivnostima.



Raspust na čistom zraku - izviđačko zimovanje

Da se slobodno vrijeme i dani raspusta mogu provesti kvalitetno i sa smislom, dokaz je još jedno zimovanje mladih izviđača iz Odreda izviđača "Igman 92".

Kao i proteklih deset godina, OI „Igman 92“ sa Ilidže započeo je godinu odlaskom na zimovanje. Ove godine lokacija na kojoj su boravili bio je planinarski dom „Prijatelj prirode“ na Malom polju. Zimovanje je organizovano u periodu od 5. do 15. januara 2020. godine i okupilo je 100 izviđača i planinki sa područja općine Ilidža. Osim članova OI „Igman 92“ na zimovanju su bili i izviđači iz odreda izviđača „Bregava“ Stolac što je dalo još veću priliku mladima da se bolje upoznaju, druže i razmjenjuju znanja i iskustva.

Izviđači uzrasta od 12 do 15 godina su kroz dvije smjene zimovanja imali priliku pobjeći iz smogom okovanog Sarajeva,

te se uputiti u novu izviđačku avanturu, a ove godine, iskusili su izviđački program na malo drugačiji način - kroz simboliku svijeta vikinga. Naime, podijeljeni u 4 vikinška klana, mladi su se upoznali sa vikinškom kulturom i običajima kroz prezentacije, igre, takmičenja i praktičnu primjenu znanja.

Kroz tematiku su ih vodili dugogodišnji izviđački instruktori, sa kojima su iskusili čari izviđaštva, stekli nove prijatelje, boravili u prirodi na svježem planinskom zraku, naučili mnogo novih korisnih životnih i izviđačkih vještina, te u svoja srca zauvijek urezali mnoga lijepa sjećanja. Ovo je bila prilika za mlade ljude da se na nadmorskoj visini 1246 metara sklone od gradskog smoga i provedu dane na planini uživajući u čistom zraku uz zdravu atmosferu koja je potreba svakoj mladoj osobi.

Obilježena 78. godišnjica Igmanskog marša

Tradicionalnim pohodom na Igman i nizom prigodnih sadržaja obilježena je 78. godišnjica "Igmanskog marša", jedne od najznačajnijih operacija tokom Narodnooslobodilačke borbe (NOB) u Drugom svjetskom ratu. Prema procjenama, centralnoj svečanosti i programu kraj Spomenika Prve proleterske brigade na Velikom polju (Igman) prisustvovalo je oko 20.000 sudionika, a pored bh. građana, članova boračkih udruženja i predstavnika vlasti, manifestacija je okupila i goste iz zemalja regiona, kao i antifašiste iz Italije, Austrije i Ruske Federacije. U skladu sa Programom manifestacije, njeni sudionici položili su cvijeće na partizansko i šehidsko spomen-obilježje na Brezovači, odajući počast žrtvama fašizma i borcima Armije RBiH. Načelnik prof.dr. Senaid Memić na Gubavcu pozdravio je sve prisutne istakavši da cijeni odlučnosti i nadljudske napore, discipline, izdržljivosti boraca i čudesnog junaštva na Igmanskom maršu. U svom govoru istakao je važnost borbe protiv fašizma.



Svakog četvrtka kino projekcije na Ilidži

Najnoviji i najgledaniji filmovi moći će se pogledati u narednom periodu svakog četvrtka u mjesecu u Multimedijalnom centru -kino Igman Ilidža. Ovaj projekat sufinansira Općina Ilidža, a realizuje ga JU KSIRC Ilidža. Projekcije počinju od u februara, pa će se nastaviti u martu, aprilu, maju, junu. Nakon toga nastaje pauza i počinje ponovno prikazivanje u septembru, oktobru, novembru i decembru.



Reprezentacij a osnovaca u odbojci prva u Kantonu

Kantonalno takmičenje u odbojci za učenike osnovnih škola održano je 16. decembra 2019. godine u Kulturno - sportskom centru Skenderija. Učestvovala su sve selekcije iz općina sa područja Kantona Sarajevo. Reprezentacija Općine Ilidža postigla je prvo mjesto. U reprezentaciji su bili predstavnici iz Prve osnovne škole: Azem Šošić, Ali Hadžihasanović i Alvin Čelo, iz Druge osnovne škole Aner Ajdinović, Aldin Fazlagić, Hamza Fočo i Kenan Herić, Osme osnovne škole "Amer Čenanović" Samed Kolašinac, Desete osnovne škole Arman Šutković, te Osnovne škole Mehmed Handžić Ahmed Grbović. Trener odbojkaške reprezentacije Općine Ilidža je Adisa Divoš.